



An Bhruiséil, 7 Márta 2025  
(OR. en)

6760/25

---

---

Comhad Idirinstitiúideach:  
2024/0276(CNS)

---

---

ECOFIN 236  
FISC 45

## NÓTA

---

ó:	An Uachtaránacht
chuig:	An Chomhairle
Ábhar:	Treoir maidir le comhar riaracháin i réimse an chánachais – Comhaontú polaitiúil

---

## I. RÉAMHRÁ

1. I dTreoir (AE) 2022/2523 ón gComhairle an 15 Nollaig 2022 maidir le híosleibhéal domhanda cánachais a áirithiú do ghrúpaí ilnáisiúnta fiontar agus do ghrúpaí mórsála intíre san Aontas<sup>1</sup> (Treoir Cholún a Dó), léirítear, tríd is tríd, na rialacha samhla, arna n-oiriúnú de réir mar a cheanglaítear le dlí an Aontais, a comhaontaíodh ag Creat Cuimsitheach G20/ECFE um Chreimeadh an Bhoinn agus Aistriú Brabúis ('CBAB'), i ndáil le hathchóiriú ar na rialacha idirnáisiúnta maidir le cánachas ar bhrabúis na bhfiontar ilnáisiúnta is mó.

---

<sup>1</sup> IO L 328, 22.12.2022, lgh. 1–58, ELI: <http://data.europa.eu/eli/dir/2022/2523/oj>.

2. Tá an cánachas íosta éifeachtach, a chumhdaítear le ‘Colún a Dó’, bunaithe ar dhá phríomhriail (na rialacha domhanda maidir le creimeadh an bhoinn a chosc dá ngairtear feasta ‘rialacha GloBE’) – an riail maidir le cuimsiú ioncaim agus an riail maidir le brabús faoi thearc-cháin – atá ceaptha chun a áirithiú go ngearrfar cáin ar ráta éifeachtach dar méid 15 % ar a laghad ar na brabúis a dhéanann grúpaí ilnáisiúnta a bhfuil láimhdeachas nach lú ná EUR 750 milliún acu. Tá Treoir Cholún a Dó ceaptha chun a áirithiú go n-íocfaidh grúpaí móra ilnáisiúnta fiontar (FINanna) íosleibhéal cánach ar an ioncam a thagann chun cinn i ngach dlínse ina n-oibríonn siad. Ní mór d’eintitis a thagann faoi raon feidhme na rialacha a ráta cánach éifeachtach a ríomh le haghaidh gach dlínse ina n-oibríonn siad agus cáin bhreisiúcháin a íoc le haghaidh na difríochta idir a ráta cánach éifeachtach in aghaidh na dlínse agus an t-íosráta cánach 15 %. Leagtar amach in Airteagal 44 de Threoir Cholún a Dó oibleagáid an tuairisceán faisnéise maidir le cáin bhreisiúcháin a chomhdú. Chun an tuairisceán faisnéise maidir le cáin bhreisiúcháin a chomhdú, ní mór teimpléad caighdeánaithe a úsáid.
3. Chun go bhfeidhmeoidh an córas sin go héifeachtach, ní mór a áirithiú freisin go bhfaighidh na húdaráis chánach faisnéis ábhartha chánach agus go ndéantar í a mhalartú go huathoibríoch. Chun na gearróch sin, d’fhorbair Creat Cuimsitheach G20/ECFE maidir le CBAB teimpléad caighdeánach (Tuairisceán Faisnéise GloBE) ar cheart é a bheith de cheangal ar eintitis chomhdaithe ar cuid iad de ghrúpaí móra ilnáisiúnta fiontar é a úsáid chun a n-oibleagáidí comhdaithe a chomhlíonadh. Dá réir sin, mar aon le rialacha Cholún a Dó, ba cheart an Tuairisceán Faisnéise GloBE a thrasú i ndlí an Aontais, chun malartú faisnéise idir na Ballstáit a éascú.

4. I bhfianaise an mhéid sin, d’eisigh an Coimisiún Eorpach togra le haghaidh Treoir ón gComhairle lena leasaítear Treoir 2011/16/AE maidir le comhar riaracháin i réimse an chánachais (TCR9) an 28 Deireadh Fómhair 2024<sup>2</sup>.
5. Is é príomhchuspóir an togra reachtaigh seo forálacha Threoir Cholún a Dó (Airteagal 44 go háirithe) a chur i bhfeidhm, lena bhforáiltear go gcaithfear an chéad tuairisciú ar fhaisnéis maidir le cáin bhreisiúcháin ó ghrúpaí ilnáisiúnta fiontar agus ó ghrúpaí náisiúnta mórsála a dhéanamh faoin 30 Meitheamh 2026. Bainfear an cuspóir sin amach tríd an méid seo a leanas a dhéanamh:
  - (a) an fhoirm chaighdeánach den tuairisceán faisnéise maidir le cáin bhreisiúcháin a leagan amach sa tslí go mbeidh ar eintitis chomhdaithe ar cuid iad de ghrúpaí móra ilnáisiúnta fiontar (a thagann faoi raon feidhme rialacha Cholún a Dó) í a chur isteach, agus
  - (b) Treoir 2011/16/AE a fhorlíonadh le forálacha lena leagtar síos creat chun malartú na dtuairisceán faisnéise maidir le cáin bhreisiúcháin a éascú idir údaráis chánach na mBallstát.
6. A luaithe a ghlacfaidh an Chomhairle TCR9, beidh ar na Ballstáit uile é a thrasú sa dlí náisiúnta sách tapa, chun bearnaí sa tuairisciú cánach a sheachaint. Dá bhrí sin, tá an amlíne chun an chaibidlíocht sin a thabhairt chun críche an-ghearr fós.
7. Glacadh an tuairim ó Pharlaimint na hEorpa maidir leis an togra reachtach seo an 12 Feabhra 2025.<sup>3</sup> Glacadh an tuairim ó Choiste Eacnamaíoch agus Sóisialta na hEorpa an 26 Feabhra 2025.

---

<sup>2</sup> 15004/24 + ADD1.

<sup>3</sup> P10\_TA(2025)0013 (féach 5822/25 freisin).

## II. STAID NA hIMEARTHA

8. Thug Uachtaránacht na Polainne tús áite don obair ar an gcomhad sin agus d'iarr sí ar na Ballstáit an obair ullmhúcháin is gá a thabhairt i gcrích in am don chruinniú a bheidh ag Comhairle ECOFIN i mí an Mhárta 2025. Le linn théarma Uachtaránacht na Polainne, tionóladh ceithre chruinniú den Mheitheal um Cheisteanna Cánach (an 9 agus an 24 Eanáir, an 17 Feabhra, agus cruinniú den Mheitheal um Cheisteanna Cánach (Ardleibhéal) an 26 Feabhra 2025).
9. Ag an gcruinniú a bhí ag Coiste na mBuanionadaithe (Cuid 2) an 4 Márta 2025, bhí na toscaireachtaí uile in ann tacú le téacs comhréitigh na dréacht-Treorach, cé is moite de na forálacha lena rialaítear an modh atá le húsáid chun foirm chaighdeánach den tuairisceán faisnéise maidir le cáin bhreisiúcháin (Roinn IV d'Iarscríbhinn VII a ghabhann le Treoir 2011/16/AE ('DAC')) a thabhairt cothrom le dáta chun a áirithiú go leanfaidh sé de bheith ailínithe leis na nuashonruithe a d'fhéadfaí a dhéanamh ar Thuairisceán Faisnéise caighdeánaithe GloBE a comhaontaíodh i gCreat Cuimsitheach G20/ECFE maidir le CBAB.
10. Chun aghaidh a thabhairt ar an ábhar inní sin atá fós ann, tar éis teagmhálacha déthaobhacha a thionscnamh, rinne an Uachtaránacht roinnt coigeartuithe breise ar an dréacht-Treoir ionas go mbainfí an cumhachtú chun gníomhartha tarmligthe a ghlacadh (scriosadh aithris 18, scriosadh Airteagal 1(8), ina raibh leasuithe ar Airteagal 21 de TCR, agus scriosadh Airteagal 1(11) agus 1(12), ina raibh téacsanna beartaithe d'Airteagail 26a agus 26b de TCR). Is é toradh na leasuithe sin ar an téacs comhréitigh go leasófaí an fhoirm chaighdeánach den tuairisceán faisnéise maidir le cáin bhreisiúcháin trí Threoir ón gComhairle (faoin nós imeachta reachtach speisialta). Leagtar amach an téacs comhréitigh is déanaí ón uachtaránacht, ina léirítear na leasuithe sin, in 6845/25.
11. Tá an Uachtaránacht den tuairim go mbaintear amach an chothromaíocht cheart sa téacs comhréitigh sin anois agus go mbainfeadh na toscaireachtaí uile na forchoimeádais a bhí fós acu.

12. Thairis sin, ag aithint di a thábhachtaí atá sé tiomantas na mBallstát uile a dhearbhu gur cheart foirm chaighdeánach den tuairisceán faisnéise maidir le cáin bhreisiúcháin leanúint de bheith i gcomhréir le teimpléad caighdeánach thuairisceán faisnéise GloBE a d'fhorbair Creat Cuimsitheach G20/ECFE maidir le CBAB, agus, chun na gcríoch sin, gur ghá gníomhaíocht thapa reachtach a dhéanamh, molann an Uachtaránacht go dtiocfadh an Chomhairle ar chomhaontú maidir leis an ráiteas a leagtar amach san Iarscríbhinn a ghabhann leis an nóta seo. Táthar ag súil go ndéanfaidh an Coimisiún Eorpach ráiteas atá le cur le miontuairiscí chruinniú na Comhairle freisin.

### **III. AN BEALACH CHUN CINN**

13. I bhfianaise an mhéid sin, iarrtar ar an gComhairle:
- (a) teacht ar chomhaontú polaitiúil maidir le téacs na dréacht-Treorach lena leasaítear Treoir 2011/16/AE maidir le comhar riaracháin i réimse an chánachais (TCR9), mar a leagtar amach in 6854/25 é, d'fhonn an Treoir a ghlacadh, faoi réir athbhreithniú dlítheangeolaíoch;
  - (b) a chomhaontú an ráiteas ón gComhairle a leagtar amach san Iarscríbhinn a ghabhann leis an doiciméad seo a chur isteach i miontuairiscí chruinniú na Comhairle.

**RÁITEAS ÓN gCOMHAIRLE**

‘Cuireann an Chomhairle in iúl a thábhachtaí atá sé ailíniú a dhéanamh idir an teimpléad caighdeánach don tuairisceán faisnéise maidir le cáin bhreisiúcháin agus an teimpléad caighdeánach a d’fhorbair creat cuimsitheach ECFE/G20 maidir le CBAB.

Chun an gealltanais a chomhlíonadh go bhfanfaidh na teimpléid chaighdeánacha sin i gcomhréir le chéile go leanúnach, iarrtar ar an gCoimisiún Eorpach togra reachtach iomchuí a thíolacadh chun Treoir 2011/16/AE ón gComhairle a leasú, ar bhealach brostaithe, a luaithe a thabharfar teimpléad ECFE cothrom le dáta agus tá geallta ag an gComhairle gníomhú chomh tapa agus is féidir chun an t-ailíniú sin a cheadú.’

---